

民國肇縣志

鞏縣志卷二十六

邑人

劉蓮青

纂輯

張仲友

邑人劉鎮華鑒定

邑人劉鎮海參閱

固始萬自逸讐校

文徵四

夏

五子歌五章

夏書太康尸位以逸豫滅厥德黎民咸貳乃盤游

無度畋於有洛之表有窮后羿因民弗忍踞於河

厥弟五人御其母以從侯於洛之泃五子咸怨述

大禹之戒以作歌

其一日皇祖有訓民可近不可下民惟邦本本固邦寧予

視天下愚夫愚婦一能勝予一人三失怨豈在明不見是

圖予臨兆民懍乎若朽索之馭六馬為人上者奈何不敬

其二曰訓有之內作色荒外作禽荒甘酒嗜音峻宇雕墻

有一於此未或不亡其三曰惟彼陶唐有此冀方今失厥

道左傳亂其紀綱乃底滅亡其四曰明明我祖萬邦之君

有典有則貽厥子孫川關石和鈞王府則有荒墜厥緒覆

宗絕祀叶卷其五日嗚呼曷歸予懷之悲萬姓仇予予將

里反

嚳依鬱陶乎予心顏厚有忸怩弗慎厥德雖悔可追

商

桑林禱辭

荀子大畧篇湯之時大旱七年剪髮斷爪以身爲  
犧牲禱於桑林之野以六事自責曰何不雨至斯  
極也言未已大雨

政不節與使民疾與宮室崇與婦謁盛與苞苴行與讒夫

興與

節叶卽盛叶成祝  
山川教之祝云云

漢

太學中謠

八願  
之一

天下英藩尹伯元

尚書令河  
南鞏尹勳

晉

在懷縣作選一首

潘岳

我來冰未泮時暑忽隆熾感此還期淹歎彼年往駛登城  
望郊甸遊目歷朝寺小國寡民務終日寂無事白水過庭  
激綠槐夾門植信美非吾土祇攬懷歸志眷然顧鞏洛山  
川邈離異願言旋舊鄉畏此簡書忌祇奉社稷守恪居處  
職司

鞏道迎駕

潘尼

南山鬱岑崑洛川迅且急青松蔭修嶺綠纈披廣隰朝日

順長途夕暮無所集歸雲乘憶浮淒風尋帷入道逢深識  
士舉首對吾揖世故尙未夷峭函方險澁狐狸夾兩轅豺  
狼當路立翔鳳嬰籠檻騏驥見維繫俎豆昔嘗聞軍旅素  
未習且少停君駕徐待干戈戢

唐

題石窟寺

魏孝文  
所置

宋 昱

梵宇開金地香龕鑿鐵圍影中羣象動空裏衆靈飛簷牖  
籠朱旭房廊挹翠微瑞蓮生佛步瑤樹挂天衣邀福功雖  
在興王代久非誰知雲朔外更覩化胡歸

按魏書孝文紀書幸武州山石窟寺書行幸方山建永

固石室於山上又書幸方山石窟寺昱詩自注魏孝文  
所置是應爲方山之石窟寺然鞏之石窟寺唐龍朔故  
希玄寺碑稱爲魏孝文帝創建則鞏實有孝文所建之  
寺昱詩曰誰知雲朔外更覩化胡歸是非武州方山之  
寺可知

夜到洛口入黃河

儲光羲

河洲多青草朝暮增

一作滋

客愁客愁惜朝暮枉渚

一作聊

停舟中宵大川靜解纜逐歸流浦溆旣清曠  
泂洞非阻修

登臚望落月擊汰

一作楫

悲新秋儻遇乘槎客永言星漢遊

鞏城南河作寄徐三景暉

儲光羲

初年雨候遲鞏洛河流小搖搖芳草岸屢見春山曉清露  
洗雲林輕波戲魚鳥唯言故人遠不念鄉川眇舟楫去滌  
迴湍激行奔峭寄書千里路莫道南鴻少

鞏城東莊道中作

儲光羲

北陵散寒鳥西山照初日婉變晉陽京踟躕野人室南軒  
草間去後乘林中出靄靄長路暖遲遲狹路歸蜉蝣時蔽  
月枳棘復傷衣城上東風起河邊早雁飛夏王紀冬令殷  
人乃正月涯口度新雲山陰留故雪幸逢耆耄話餘待親  
鄰別總轡出叢薄歇鞍登峻隅春源旣蕩漭仗戰亦睢盱  
未獲遵平道徒言信薄夫



鞏北秋興寄崔明允

岑參

白露披梧桐，玄蟬晝夜號。  
秋風萬里動，日暮黃雲高。  
君子佐休明，小人事蓬蒿。  
所適在魚鳥，焉能徇錐刀。  
孤舟向廣武，一鳥歸成臯。  
勝概日相與，思君心鬱陶。

尋鞏縣南李處士別業

岑參

先生近南郭，茅屋臨東川。  
桑葉隱村戶，蘆花映釣船。  
有時著書暇，盡日牕中眠。  
且喜閭井近，灌田同一泉。

送孟十二倉曹赴東京選

杜甫

君行別老親，此去苦家貧。  
藻鏡留連客，江山顛顚人。  
秋風楚竹冷，夜雪鞏梅春。  
朝夕高堂念，應宜綵服新。

遊石窟寺

劉滄

苔徑縈迴景漸分，  
翛然空界靜埃氛。  
一聲疎磬過寒水，  
半壁危樓隱白雲。  
雪下石龕僧在定，  
日西山木鳥成羣。  
幾來吟嘯當朱檻，  
風起天香處處聞。

自鞏洛舟行入黃河卽事

寄府縣寮友

韋應物

夾水蒼山路向東，  
東南山豁大河通。  
寒樹依微遠天外，  
夕陽明滅亂流中。  
孤村幾歲臨伊岸，  
一雁初晴下朔風。  
爲報洛橋遊宦侶，  
扁舟不繫與心同。

酬李相公喜歸鄉國自鞏縣夜泛洛水見寄

劉禹錫

鞏樹煙月上清光含碧流且無三已色猶泛五湖舟鵬息  
風還起鳳歸林正秋雖攀小山桂此地不淹留

鞏路感懷

呂溫

馬嘶白日暮劍鳴秋氣來我心浩一作無際河上空徘徊

送諫議十六叔至孝義渡後奉寄

孟郊

曉渡明鏡中霞衣相飄颻浪鳧驚亦雙蓬客將誰僚別飲  
孤易醒離憂壯難銷文清雖無敵儒貴不敢驕江吏捧紫  
泥海旗翦紅蕉分明太守禮跨躡毗陵橋伊洛去未迴遐  
矚空寂寥

至孝義渡寄鄭軍事唐二十五

孟郊

咫尺不得見心中空嗟嗟官街泥水深下腳道路斜嵩少  
玉峻峻伊維碧華華岸亭當四迴詩老獨一家洵叟何所  
如鄭石唯有些何當來說事爲君開流霞

憶至鞏縣河宿待家累追懷

李紳

鞏樹翻紅秋日斜水分伊洛照餘霞弓開後騎低初月鷄  
駐前旌拂暮鴉聞信坐遲青玉案弄兒閑望白羊車今來  
憶事涼風晚烟浦空悲黃一作寒菊花

宿石窟寺

一刹古岡南孤鐘撼夕嵐客閑明月閣僧閉白雲庵野鶴  
立枯枿天龍吟淨潭因知不生理合自此中探

送盧少府之任鞏洛

李洞

從知東甸尉銓注似恩除帶土移嵩木和泉送尹魚印牀  
寒鷺宿壁記醉僧書堂下諸昆在無妨候起居

太康

周曇

師保何人爲琢磨安知父祖苦辛多酒酣禽色方爲樂詎  
肯閑聽五子歌

宋

永昌陵輓詞

李昉

丹青史筆敢虛張功德巍然軼漢唐奠玉五回朝上帝御  
樓三度納降王

題鞏縣西門周襄王廟

晏殊

人來人去市朝變山後山前煙霧凝  
縈帶二川河洛水寂寥千古帝王陵

次鞏縣

宋庠

昔走成周道春風尙落花  
頃歲春末赴洛陽今馳河內傳秋日正

臨霞山色依前綠顛毛只是華見迎多故吏衰壯兩驚嗟

洛陽故吏皆迎余于道

謁四陵下宮

宋祁

四陵煙柏蔽團暉曉東朝紳拜廟闈  
臺下俗無西向射寢中人護月游衣  
垂髯上漢龍難見耘野連天鳥自飛  
酌畢

驅車循故道經時回望悵依依

太祖永昌陵

宋 祁

石馬開陵道陰虬結廟阿飛雲似不去疑誤大風歌

太宗永熙陵

宋 祁

白虎晨端迴青龍夕霧和漢陵人易識流水記岷嶓  
故老今多喪嚴祠日愈新青青陵上杏神護五株春

真宗永定陵

宋 祁

金石凝虛筍旌旗落暗塵唐堯遂不見空有進羹人  
洛水縈祠外崧雲泊棟端橋山何必問只是葬衣冠

永昭陵挽詞三首

歐陽修

與子雖天意知人昔帝難一年謀早定九鼎勢先安大舜  
仁由性成湯治以寬孤臣恩未報清血但沈瀾

干戈不用臻無事朝野多歡樂有年便坐看揮飛白筆侍

臣新和柏梁篇衣冠忽見藏原廟簫

一作笳

鼓愁聞向洛川

寂寞秋風羣玉殿還同恍惚夢鈞天

行殿沈沈畫翼重淒涼挽鐸出深宮攀號不悟龍胡遠侍  
從猶穿豹尾中日薄山川長起霧天寒松柏自生風斯民  
四十年涵煦耕鑿安知荷帝功

續作永昭陵挽詞五首

歐陽修

王者居尊本無外由來天下以爲家六龍白日乘雲去何



用金錢買道車

苦霧霏霏著綵旗猶排吉仗雜凶儀常時鳳輦行遊處今日龍輶動哭隨

都人擾擾塞康莊西送靈車過苑墻金鼎藥成龍已去人間惟有鼠拖腸

素幕悠悠逗曉風行隨哀挽出深宮如嬪莫向蒼梧望雲覆昭陵洛水東

叨陪法從最多年慣聽梨園奏管絃從此無因瞻黼坐惟應魂夢到鈞天

鞏縣陪祭獻懿二后回孝義橋道中作

落日漢陵道初寒慘暮颯遙看山口火暗渡洛川橋不見  
新園樹空聞引葬簫林鴟棲已定猶一作獨此倦征鏢

鞏縣初見黃河

河決三門合四水徑流萬里東輸海鞏洛之山夾而峙河  
來齧山作沙觜山形迤邐若奔避河益汹汹怒而詈舟師  
弭楫不以帆頃刻奔過不及視舞波淵旋投沙渚聚沫倏  
忽爲平地下窺莫測濁且深癡龍怪魚肆憑恃我生居南  
不識河但見禹貢書之記其言河狀鉅且猛驗河質書信  
皆是昔者帝堯與帝舜有子朱商不堪嗣皇天意欲開禹  
聖以水病堯民以瀆堯愁下人瘦若脂衆臣薦鯨帝曰試

試之九載功不效遂殛羽山慙而斃禹羞父罪哀且勤天  
始以書畀於姒書曰五行水潤下禹得其術因而治鑿山  
疏流浚畎澮分擘枝派有條理萬邦入貢九州宅生人始  
免生鱗尾功深德大夏以家施及三代蒙其利江海淮濟  
洎漢沔豈不浩渺汪而大收波卷怒畏威德萬古不敢肆  
凶厲惟茲濁流不可律歷自秦漢尤爲害崩堅決壅勢益  
橫斜跳旁出惟其意制之以力不以德驅民就死於  
蓋聞河源出崑崙其山上高大無際自高瀉下若激箭一  
曲一直一千里湍雄衝急乃迸溢其勢不得不然爾前歲  
河怒驚滑民浸漑洋洋淫一作注不止滑人奔走若鋒駭河

伯視之以爲戲呀呀怒口缺若門日啖薪石萬萬計明堂  
天子聖且神悼河不仁嗟曰喟河伯素頑不可令至誠一  
感惶且畏引流辟易趨故道閉口不敢煩官吏遵途率職  
直東下咫尺莫可離其次爾來歲星行一周民牛飽芻邦  
羨費滑人居河飲河流耕河之孺浸河漬嗟河改凶作民  
福嗚呼明堂聖天子

過温寄鞏縣宰吳秘丞

邵雍

風軟玉溪騰碎騎花繁石窟漾歌舟相望咫尺仙凡隔不  
得同陪三月遊

送直講吳殿丞宰鞏縣

王安石

青嵩碧洛曾遊地，墨綬銅章忽在身。  
擁馬尙多畿甸雪，隨衣無復禁城塵。  
古來學問須行已，此去風流定慰人。  
更憶少陵詩上語，知君不負輦梅春。

出鞏縣

王安石

昭陵落月煙霧昏，篝火度谷行山根。  
投鞭委轡涉數村，寤出鞏縣城東門。  
向來宮闕不可見，但有洛水流渾渾。

題永昭陵

王安石

神闕澹朝暉，蒼蒼露未晞。  
龍車不可望，投老涕霑衣。

書任村馬舖

王安石

兒童繫馬黃河曲，近岸河流如可掬。  
任村炊米朝食魚，日

暮榮陽驛中宿投老經過身獨在當時洲渚今平陸  
穠黍冥冥十數家仰視荒蹊但喬木冰盤繪美客  
自知起看白水還東馳爾來百口皆年少歸與何  
人共此悲

孝義橋

韓維

殘花辭故都細雨度清洛浮梁拖龍腹徑石亂鵝  
殼山形豁如對林色秀可握漁子何處來長層波  
面落

之石窟寺馬上作

韓維

今辰忘我勞幽事隨所歷翠麥圃一川黃花明半  
壁山林契宿尙老大悲物役便欲從溪僧分居窟  
崖石

送人朝饗裕陵

賀鑄

三年不見鼎湖龍  
弓劍塵埃玉座空  
白髮孤臣心斷絕  
滿山明月柏城風

渡洛因泛舟東下數里頗意淮上

汭汭清洛轉山隈  
渺渺東流不復回  
輕鳥竟隨青嶂去  
亂波爭泛夕陽來  
偶驚舟楫鄉心起  
乍脫塵埃病眼開  
疑是盱眙郭門外  
月明帆席過清淮

金

羅漢泉

并序

僧福安

予自興定二年正月十有三日因徇其請來居是刹  
乘閒有一舊住老衲謂余曰寺之西南百步之外林

壑之間昔有一泉名曰羅漢其水甘冷其味常諫渠引于寺中宛轉旋流大得其用泰和己未歲多苦旱泉遂枯之十三年矣予既聞之感歎不已興定三稔中夏廿五日泉乃復出于是老衲重謂余曰此泉頗靈人皆不知自昔已來有二奇事一表主者有德一表寺之隆替今則泉湧倍常雖非吾師深有德行寺之復興歟敢請和尙下一轉語發揚此一段公案乎不肖爾時忻然默筆爲書鄙語一章用紀其實可爲千古之下崧陰之勝事耳

羅漢幽栖地最靈泉因羅漢便爲名昔年曾向瓶中瀉今



日還從石罅傾聲雜松風涼枕簟光連山月照簷楹可  
怜奔走黃塵客來此冷然翫濯纓

清明後一日遊青龍山羅漢院

邵公高

亂山深處春深處殿閣參差壓石垣梨白桃紅寒食節風  
香雨細給孤園脩廊拂拭看詩句好景流連卧酒罇幽興  
此間殊不淺林邊歸路踏黃昏

石窟寺

邑令牛承直

老去尋山意漸便興來登覽獨怡然僧歸禪榻香凝帳人  
喚漁舟晚濟川清洛冷光浮巨棟靈崧積翠拱中天公餘  
底事頻來此民遠官刑不用鞭

明

鞏洛道中

禮部 侍郎薛瑄

嵩高雲氣晚嗟峨清洛西風咽急波水色山光渾似舊宋  
家陵墓夕陽多

由蓼子谷取捷路抵鞏黃北徙有感 薛瑄

此路經過已十年重來河水變桑田西風不盡登臨意又  
見寒鴉下夕烟

題宋復古鞏洛圖 謝徽

青山鞏洛舊林園彷彿昇平古意存雨外人歸秋葉浦煙  
中鳥下夕陽村昔年題字宸光合今日披圖野興繁風景

西湖仍不異惟餘故老說中原

石窟寺

府尹張 綬

野寺枕清洛古像鑿崖石軒窗眇空曠樓閣愧金碧僧多  
龕崑居門爲嵩少闢我來值秋晚高下窮勝蹟萬籟息衆  
竅千花紛講席乘興宿禪房梵音徹寒夕

弔杜公墓

陳獻章

裸葬不葬等悠悠有生無生名可留壽遲殤子千年在文  
興江河萬古流天借人心照日月山藏廟貌自春秋拾遺  
苦被蒼生累贏得乾坤不盡愁

黑石渡

于 範

山足滌清波渡頭枕黑石野花學菊黃山東如丹赤高岸  
穿山過深溝落葉集雲靜正秋空出門雙眼碧

經少陵墓

周敘

杜陵詩客墓遙倚北邙顛斷碣居人識高名信史傳猿聲  
悲落照樹色翳寒烟惟有文章在輝光夜燭天

洛口驛

失名

驛古人初靜林深夜倍清寒蛩引鄉淚歸雁帶邊聲明月  
知心事青山減宦情馳驅何日了温飽愧生平

石窟寺

分府桑浦

二月十七郊外行嵩山洛水眼分明已勞地主盤餐薦更

遣山僧管籥迎緣磴酣歌春日暮凭闌擊目晚風清酒殘  
不盡登臨興月印灘頭一艇橫

慈雲寺

趙迎人邑

昔我登山未盡頭此心鬱鬱幾經秋重過溪澗酬前志再  
陟巉巖繼舊遊接地風雲隨我轉連天景色許誰收危峰  
絕頂堪舒目得句敢云家倚樓

送周編修代祭宋陵

王英

明庭秩祀降深恩詔遺詞臣出諫垣遠歷山川周洛邑肅  
陳俎豆宋陵園御香滿路花爭發宮柳連堤日正殷最愛  
近陵諸父老攀援羅拜擁行軒

市河橋

劉 醇

尋芳策杖市橋前柳色垂金二月天宿霧纔開初出日經  
風又散曉來煙沙汀燕子啣泥語蓼岸鴛鴦貼水眠尤勝  
灞陵風景好一川城郭翠微連

清

渡洛水

王士禛

脉脉中流望盈盈羅襪塵西園魏公子南浦洛川神蘅薄  
芳猶在楊林意未申凌波何處問秋水正魚鱗

宋陵

王士禛

洛水邙山飽廢興宋家幽寢闕魚燈奉香不見臨安使白

日茫茫下七陵

七夕前二日鞏縣阻雨

王士禎

大火西流日昇仙故跡存秋風來鞏洛暮雨阻輾轅欲把  
浮邱袂難招杜甫魂神嵩不可眺三十六峯昏

黑石頭渡洛水

李因篤

古道長依洛前津始放船青泥通沃土黑石泛疎烟豆粥  
凌晨具魚肪度地偏御風隨所適江海正悠然

鞏洛道中書所見

陳維崧

鞏洛饒陂陁水土互蟠結挾幽布險勢鑿孔露奇節重隙  
積屨屨怪竅囊帶埠居民數百家伏處類巢穴村墟濶

岷衡宇補凹凸批亢架桷染擣虛置櫨椳玲瓏勝鬼工爰  
貼儼地設乃知般倅外別自有巧拙東南一土巘壁若昆  
刀切居者累彈丸縹緲詫奇絕重樓俯鳥道甕牖瞰蟻垤  
盤旋萬累紋雕樓百蟲齧盡室頗淳熙聚廬復精潔噉咷  
雜童穉偃僂半耆耄嬌女曉塗抹瘦妻解補綴春秋放雞  
豚早晚閉門闌我顧居者言此境堪咋舌一朝秋雨塌陵  
谷遭崩缺將毋愚公移或者龍火掣居者啼向我長跪對  
余說前朝昔喪亂蛾賊起作孽秦隴跳銅脰楚豫潛草竊  
峩峩洛陽道千里大流血白晝無貔貙黃天恣饕餮妻孥  
飽刀鋸骸骨供蠶蠶距料寰宇清及見機槍滅興亡祇轉



瞬世事纔一瞥苟活幸至今枯菀何區別我聞吳越間甲  
第金張列文椒塗不足更取都梁蕪此疑太暴殄翻恐致  
蹉跌何如此間人任運無曲折飽飯過殘年踏盡岬山雪

鞏縣

潘耒

鞏洛東周隘經行險始知河流吞岸窄山勢壓城危勇豈  
投鞭渡輕難並轡馳洛倉遺蹟在轉粟至今宜

黑石渡

湯右曾

昨從邨山來今從邨山去邨山朽骨萬萬古惟有行人朝  
復暮黃金蝕盡白石爛螻蟻三泉尙知處我來欲醉酒一  
盃落日荒荒下前渡

元日發鞏縣

湯又曾

看山四面碧嶙峋且免車中邑邑人殘雪未消前度臘寒  
梅已帶乍回春老知時節心情減閒覺風花景物親二十  
年來兩元日天門頂上洛河濱

丁丑元日舟次白沙  
得登天門山絕頂

巖子陵祠二首

呂履恆

霜落秋城木葉丹客星祠畔肅衣冠故人無意驕同卧天  
子何能屈一官巖瀨江山空浩渺原陵松柏自高寒東都  
多少知名士不及冥鴻一羽翰

鞏邑東來淨路塵子陵祠畔正芳春客星不與炎灰滅一  
代流風賴故人

黑石關

呂履恆

嚴關東望意蕭騷石立山開見古濠  
曉樹片帆回洛汭霜天一雁下成臯  
人家雨後黃沙靜戰壘秋空白日高  
底事棄繻猶履躋三年重過問村醪

三經黑石渡

三言

屈復

東山雲西山雨黑石關三回渡桂折風  
蘭摧露布帆來仙舟去天蒼蒼烟茫茫  
風冷冷心耿耿漢名士魯男子角巾羞  
大兒耻易水寒髮冲冠秦宮筑鬼夜哭  
登龍者空啼血屠狗者膽如雪龍之神  
虎之尊尾可拔珠可奪蕙歎芝不逢時  
吝一死婦人耳思一御淚如注馬如龍  
車如轂雁哀

鳴不忍聽

四經黑石渡

屈復

空水澄鮮白於練空林雲飛疾於箭七月四向黑石過一  
過一回哭綠波落木飛蓬兩岸浮漁竿樵爨沐清流龍準  
子孫如常在布帆不渡漢家秋蘭榭桂棹悵已矣風吹夕  
陽照秋水

王亥山

在鞏

王鐸

摩盪初無已輒思倒太玄洛噉吸海底匿卉香人前寒暑  
巖爲變靈光廟不前景留恬衆慮幽媚可能還

近寇鞏國神堤山行

王鐸

高眺蒼龍脊今來興欲闌  
河隨鞏草折風度宋陵寒  
躑躅依長劍欹崎歷一官  
虎牢血戰處客淚向誰彈

春暮黑石渡舟行

王鐸

昨日離家井煙波爲灑然  
光吞天已墮峰走石俱懸  
晚磬何方寺閒心萬里船  
春期辜負盡但恐又年年

宋陵

王鐸

野樹陰深古路高宋陵一  
望暗蕭騷龍收夜雨沈沈  
水虎過寒沙泯泯壕地下  
衣裳空玉匣人間宮殿失  
金寮裴徊時有嵩雲入飛  
來飛去落九臯

黑石渡

王鐸

洛汭襟喉古石亭往來一舫下巖高西窺函谷三秦小東  
去河流大海青戈甲金銷殲土豹農桑均饁寶村霽酒闌  
嗚鳴歌幽雅何處薔薇送晚馨

鞏子國謠

王鐸

心不同火金門關心既協力火然寇

黑石渡

劉青藜

朝發上東門夕抵黑石渡川原何逶迤崗嶺莽回互伊洛  
與瀍澗派別齊東赴匯流朝大河羣山夾北注側聞李郭  
儔當年曾此聚門龍舟亦仙御榮渡還慕名流矜氣節義  
士爭馳騫惜哉標榜盛奇禍中黨錮羣小焉足尤諸公無

乃固遂俾國一空炎運以不祚我來千載下俯仰空自顧  
扣舷獨放歌伊人不可晤

宋陵行

劉青藜

前有高高後北邙伊洛縱橫盤中央青龍掉尾紫金接天  
水遺冢紛低昂殿宇灰飛松楸盡殘碑斷碣橫夕陽伊昔  
東都全盛日朝陵儀制何煒煌金吾百里罷傳呼黃麾仗  
絡鼎湖傍素衣步入司馬門百官鱗次鳴璆琅歲時二仲  
尊宗正冬衣捧獻來嬪嬙七世相沿成故事青城禍起殊  
淒涼懷愍蒙塵瑯琊南翠微不守熊羆亡驪山銀海九嶷  
匣摸金何代無中郎神臺壘裂特諱詞南山雖錮得無戕

十二金牌棄兩河護陵劉湛空相償澗水流澗亦偶然可  
憐父老夸禎祥五國遊魂置腦後含桃那問金粟岡轉眼  
崖山颶風起蘭亭真帖尤堪傷冬青樹上靈禽飛法惠寺名  
遙祀復何望雪晴日暖西京道昨朝夾馬今隋倉歷歷興  
亡在眼底臨風三歎獨徬徨回頭卻憶陳橋驛黃袍擁戴  
日無光

杜村陵墓

劉青藜

萬里清明節回頭憶北邙可憐出巫峽曾未到襄陽故國  
三千里羈魂二十霜蹉跎稷契志終古恨茫茫

登鞏縣南城樓

劉青藜



獨上城南百尺樓，山川迴合古東周。  
螭碑萬笏插龍尾，雉堞千尋跨虎頭。  
洛口倉空餘故壘，平津橋斷冷荒洲。  
東風楊柳垂垂綠，極目斜陽動客愁。

鞏縣東看隔水桃花

府尹張漢

桃花能綠柳能紅，互影含光晚日融。  
四水交流山盡處，三春一半客愁中。  
尋常島嶼仙源出，咫尺烟雲驛路通。  
竟敢題詩詩聖里，爲憐風物鞏城東。

黑石關題壁

張漢

有水嶽嶽有石齒，齒我數乘槎往來於此。  
但記姓名功無足紀，萬山之上萬山之下。  
杜當陽侯意何爲者，問彼身後。

名生前酒盃孰真假

詩聖祠

張漢

天縱詩將聖人驚  
筆有神禹臯元始志  
寒餒竟終身廟祀  
忘鄉里石文記水濱  
瓣香吾所重此地獨尊親

石窟寺

呂謙恆

匹馬倦猶往啼鶯聲  
自和客來樵徑少松覆澗雲多  
奧蹟占興廢孤遊寄嘯歌  
偶逢田父至話向北山阿

望宋陵作

桑調元

洛水春蕩潏卽山高崔嵬  
山水映終古人事多興衰  
陳橋黃袍擁鼎業東京閑羣  
姦不破碎靖康釀奇災宋社  
旣南

遷良嶽生蒿萊盤圃七陵氣蕭瑟蒼山隈臯亭飛白燕舟  
覆無遺骸江東燐火冷鬼哭冬青哀升高睇珠邱莽決隔  
風埃其誰腸木石不識昆明灰

杜工部祠

呂守曾

邛嶺東來勢不齊殘碑屹立河之西金蘚剝落字難捫空  
來繫馬綠楊枝雞皮野老相邀坐淡水濃陰憩少時指點  
路東新廟堂建自周南張太史額曰詩聖杜工部當年篤  
生在此里天地間氣鍾一身穆然詩思含真宰一飮不敢  
忘君國何但區區驚神鬼新安石壕恣苦吟西去北徵徒  
憂死後世詩人皆師承契合非詩以性始太史名集傳河

洛爲聖者徒應如此有唐到今已千年請爲太史屈一指

聚山園

姚爾申邑人

東園肄業地風雨蔽數椽遙望五乳秀近窺白雲巔風光  
圍斗室衆壑與堦連春和聽鳥啼秋深看鹿眠晴明文物  
景陰雲太古天經歲覽勝概幽奇總無邊端居茅檐裏頓  
爾忘塵緣游心仁義府畊我方寸田冬裘與夏葛奚復羨  
餘錢爲憶陶靖節樂以望其年

到任

張乾二邑人

魚目休相混瓦珉不並列蓬蔴原自異苗莠當有別羣盜  
方縱橫國運歎孰孰勦餉已不給始有練餉設生靈不可

盡民若許自結乃有不軌徒乘機思草竊大則爲獫狁小亦爲蠹螿賊若與民若彼此相吞齧蔓延至今日厥禍最爲烈余既令斯邑奉命來簡閱民各宜自愛賊亦宜自潔民既能輸誠災眚爲爾輟賊若能歸化亦不終爾絕儻如虎負嵎稔惡恣奸譎天兵一朝臨定不寬爾繼九族並一邱俱爲鯨鯢滅皇恩似海闊勞來情切切甯爾非爾敵子言不再說

詠古十首錄八

張乾二  
人邑

子房本韓人功名乃在漢思酌四世知無計舒憤惋難憑力士椎輕將七尺換仗策謁高皇帷幄藉翊勸西入咸陽

關國耻雪一旦列封雖晉留都將浮雲看功成卻歸來優  
游恣泮渙乃知達人心何處可牽絆儻若東海死荆軻止  
同斷不然學寒蟬亦僅四皓冠

子去歸江南我留戰冀北各有千秋業相期在努力臨行  
再叮嚀勿忘家與國轉鬪虎豹場恢復荆與棘熱血何處  
洒磨向戈頭墨事業雖未成壯哉英雄色至今劉越石豪  
氣尙崱峩

陶令辭彭澤歸來儘日閑雲出本無心鳥倦自知還松菊  
猶存處門設而常關偶逢送酒人悠然對南山胡爲詠荆  
軻忽發壯士顏生平無限意長歌露一斑

荆山產白玉含暉動林樾卞和偶得之懷寶不忍沒持以  
干楚王再獻再被別乃知福之源卽是禍之窟至哉師有  
言最能硬人骨沽之須待價何可輕相謁

孔明卧南陽已定三分計不遇湯若武且把柴門閉一朝  
逢先主三顧煩聘幣如魚方得水君臣結真契南向取荆  
襄東吳已控制西向取巴蜀遂成偏安勢渾一雖未能大  
統續赤帝誰其嗣前軌當在典午際王導在晉元稱可只  
經濟邇來數千年英風無人繼

吾聞陳希夷學通天人秘生當五季末欲睡不能睡騎驢  
出華山思古太平事忽聞聖人興黃袍正大位適愜生平

懷一笑遂墮地反轡入烟霞安排枕與被從此干戈息不復勞夢寐

邱明盲于目乃成春秋傳龍門下蠶室史記文體變一時雖困阨文章千古擅回看綺袴兒真同塵土賤昌黎貶潮陽八代中僅見東坡謫儋耳海外爲後殿

淮陰下三齊威德已震主况復封假王要君與分土高鳥尙未盡狡兔尙未取姑留功狗在以待飛走捕一旦渾一成擒之不用武朝爲萬乘王暮作階下虜韜晦猶不知乃羞絳灌伍致令一女子玩之於掌股可憐蓋世豪受戮同刳殺豈知進食時漂母有先覩施恩不望報此義超千古



流民歎

張乾二

舉目乾坤正流血，貌猶磨牙獠，舐舌紛紛流民從西來。更  
向何處避饕餮，父子兮夫棄妻，宛似鳥獸各東西。瘡痍  
滿前，看不得呼吸喘噓，晝夜啼我見此狀，中惻惻持粥相  
飯，就道側流離播遷，乃至此撫膺不覺長太息。流民環集  
向我言，此是天堂莫愁煩，更有愁煩不可述。述之恐君淚  
潺湲，中有老人瘦杖，杼自云秦人世農家，子姓宗族最繁  
衍，耕田鑿井爲生涯。一從海內遭喪亂，二十餘口盡糜爛。  
我樵山中幸未歸，九死一生脫大難。死者已矣不足傷，生  
者逃命在他鄉。又聞他鄉賊更烈，此身不知死何方。又有

壯者前致詞家住雒南雒水湄前有流寇境上過全家被  
擄無子遺老父剖腹爲馬槽老母剝皮飼犬獒嬌兒猶堪  
作箭的反接懸竿百尺高妻女流落不可說我身長大賊  
所悅朝朝鋤草充伴當一縷生命得不絕又有少婦亦告  
子妾實走脫自刑餘翁姑丈夫飽刀鋸妾以紅顏載後車  
車中有時偷眼望望見賊營夜打亮死骸積山燒蠟炬淤  
血河流漂戈仗其後賊戰幸少挫官兵得妾向馬馱凌辱  
萬端甚於賊忍憤含羞仰咳唾官兵再敗賊再勝乃得如  
魚脫釜甌官兵卽賊賊卽兵兵賊何嘗有徑庭我聞此語  
轉增涕試看寰宇何等世黃巢殺人八百萬今日胡能以

萬計高皇養士三百年臨危賴爾濟傾顛官兵卽賊賊卽  
兵此言何堪入史編嗟爾流民命何窮誰向衽席拯哀鴻  
眼看神州盡陸沈我欲叫天天夢夢

渡河

張乾二

大河泊渡水連天一劍隨身枕浪眠千古興亡多少事烟  
波淼淼恨綿綿

秦鏡詞簡呈吳按臺

張乾二

明月一輪湛秋空說是秦家舊時銅秦時不知何處得鼓  
鑄應是軒轅工後來秦氏失其明高帝提劍入咸京取鏡  
懸挂在心頭知人善任發光瑩邇來二千有餘年神宗潛

伏在荒烟碧光紫氣人不識更從何處辨姪妍長白真人  
初馭宇寶鏡重出光芒吐拔從泥塗加拂拭高懸仁壽照  
九土前歲妖氛起涼州降魔何人揮戈矛幸而天心方厭  
亂漸次撲滅豈人謀魑魅魍魎貪天祿變化人形同逐鹿  
顛到皂白含妙巧白日充斥混魚目帝曰爾鏡能辨此尙  
其持節渡渭水瓊瑤爲帶玉爲匣龍虎雀武彰身美秦中  
原是舊遊地重來山川著靈異一照錢神皆破膽再照妖  
狐盡墮淚山魃野怪咸貢狀歸來獻俘彤廷上驅逐流放  
正國刑從此陸海無波浪帝曰是役惟乃力侯乃容城鐵  
券勒氏乃曰龍名曰護尙往欽哉卽乃國我本山雞性復

癡愧無五采作羽儀託君餘照爲君舞舞斷雙翎君應嗤

青龍山洞

孫汝工

邑人

攜筇信步入山隈古洞幽深翠柏栽路向荒陰留白雪門  
臨石磴長青苔塵封佛像無今昔遊歷人蹤有去來閒覓  
殘碑摹古篆夕陽欹下幾徘徊

古意

孫汝工

相思已數年相見偏不語君心自知妾妾意羞難舉歡娛  
有百千聞別淚如雨

將夕洛水上

曹鵬翊

邑人

傍晚蒼茫意何知造物閑波搖西落日影動北邙山暮鳥

鳴前渡歸樵走下灣  
吾生波浪裏淡淡解愁顏

石窟寺

焦侗

森森長川天際來  
急流迴處寺門開  
洞深蘿薜疑無路  
境入烟霞別有臺  
殿角山泉常濺雨  
壁間石像半侵苔  
逢僧偶借蒲團坐  
話到無心萬想灰

嚴子陵祠

熊攀龍

客星遺像古眉宇  
自高寒落落桐江上  
千秋一釣竿

夏日竹林寺覓竹

趙作人  
邑人

竹院行來暑氣蘇  
問僧肯乞此君無數竿  
移種茅簷下風雨  
瀟瀟伴老夫

小憩亭

邑令陳龍章

十載芝田轉眼過  
茅亭小築近岩阿  
攜來綠綺隨身久  
醉後青山入夢多  
微雨頻翻裁菊譜  
薰風時送採蓮歌  
莫嫌斗室惟容膝  
且免星軺動薜蘿

田氏紫荆里

翁志琦

田氏遺墟沒草萊  
春風猶見紫荆開  
願攜當日連枝種  
分與人間處處栽

齋中雜詠

八首錄六

孫枝榮  
邑人

幽居探元妙茫然到無始  
鈍拙非所計自號大樸子  
美人  
在雲端折蘭招心喜  
吾猶謂多事掉頭不之起

掩關絕人事一病抱此身高枕懶調藥獨坐白凝神有時  
一樽酒感激到古人戶外聞太息恍惚若爲真

由來用智短况我賦性愚有時誠至處詐者亦信余乃知  
物無乖斯人皆吾徒魍魎與魑魅曾敢相怨無

尋勝不辭疲著屐登南山茫然一回首念及天地間天地  
已生我此生亦胡然歸來齋中坐明月照闌干

漢有江都相一朝策賢良誰知天地心窺之在深藏繁露  
八十卷聖筆獲紀綱淺於論古人但道治公羊

古風久不傳八代代益甚唐興有陳子慨然以爲任李杜  
大手筆一一出其蔭此風今已衰使我淚不禁



青龍山紀遊 三首

孫枝榮 邑人

主人一杯酒勞我遊山屐山行入冷溝冰雪太古積風烈  
巖石落泉脈凍滴瀝亂峯碧插天天光露微白雲際忽燒  
紅心知日已夕同行四五人箇箇無停策樵夫炊寒烟吼  
之反見責下有老龍潭深蟠千餘尺語聲不自檢十月起

霹靂

冷溝

夜抵慈雲寺山色隱昏黑寺僧謹管鑰戒我夜無出晨起  
急登尋虎跡傍門室猿猴羣引至相將曬朝日照羣峯  
上峯峯弄顏色喜與懼交加我遊如不克

慈雲寺

山行隨溪轉危磴傍巖高日者苦多病數日興猶豪突見

石人山攬衣便山椒峯連三千黛拱峙分巉嶢蒼然一石  
丈太素容不彫不知何代人獨立化層霄得非遯世上白  
雲鎖寂寥淮南有小山山中漫相招

石人峯

館蘇五詠

孫枝榮

落翠亭

一亭對南山山翠翠欲落好雨憐昨夜峯巒淨如濯生涯  
亦何寄相酬以春酌

垂柳塘

塘水綠溶溶塘邊多垂柳春色本無私已到此間久何事  
千載上獨爾靖節有

古蘇堡

人代不可紀堡障存古蘇至今芳草色青青不肯枯于何  
稽明德使我空踟蹰

水北渡

渡口寂無人夾岸春草生時見白鷺下波閒戲新晴吾亦  
愛閒遊兩心各不驚

釣魚灣

把釣翁爲誰日日坐釣磯吾每川上遊相逢不相知日暮  
長歌去吾亦沿流歸

杜工部祠

孫枝榮

麻鞋傳舊史，豆壠謫文僊。舉世推詩伯，無家老暮年。夢中秦邸第，客裏蜀山川。寂寞千秋後，靈歸故井烟。

月夜行舟

孫枝榮

薄暮下征馬，黃昏登賈船。賈船載明月，橫照蘆葦間。崖上蘆葦斷，且續離離村落來。復去誰家夜深猶捲簾，應是秋思最多處。

咏古

孫枝榮

力不挽石射不貫，札衛霍門下。士封侯，十七八是時雲中。

舊飛將閒坐田間話塞上

答曹慎堂

并小引

焦萬年

邑人

前呈俚詞佇望開飲接讀來札復以七年之功破  
戒非易爲辭咄酒葦都是幻影何苦認幻成真卽  
此未能解脫又是一重公案因彼來札說法之意  
作斷句四首用代說偈伏願握定光明拳打破痴  
迷膜除卻煩惱緣同登歡喜地正無用面壁三思  
致吃當頭一棒也呵呵錄呈

曾否臨風挂酒瓢七年公案待今銷早除煩惱歸歡喜免  
使豐千舌再饒

五柳三閭孰是非樽前且話箭鋒機從知醉裏真如現好  
向蘭陵學皈依

周妻何肉根塵在奚獨傷生是酒杯七載不知收效否祇  
今臨酌尙徘徊

世味旣同泡影幻閒情漫比絮泥沾箇中三昧君參透學  
佛成仙兩不嫌

咏倉西牛王廟古柏

曹肅諭  
邑人

廟旁古柏大數十圍根盤崖上幹插溝底曲折天  
矯髣髴渴龍奔澗而虬枝倒起又若回身露爪相  
傳李密據洛口倉建厥神祠於其地此必隋唐間  
物也率成二律以志弔古

隋唐之際樹將軍龍臥高岡矯出羣作勢斜吞澗底月翻

身倒攬嶺頭雲枝摩劍戟當空舞濤鼓雷霆入夜聞割據  
英雄今已矣蒲山事業不如君

李密自號蒲山公

任子愚溪三節事畧題辭

并引

曹肅諭

余少時就試洛陽與愚溪訂金蘭好以通家禮晉  
謁中堂伯母劉太孺人垂白扶杖道及生平守節  
事自金陵遷洛兩子繼逝輒欷歔泣下又請拜嫂  
氏王孺人孺人未出見也然其苦志堅貞愚溪時  
爲余垂涕言之並述胡女投繯狀將謀迎觀歸里  
與堂仲兄合詞以可否質余余曰伯母兩婦一貞  
一烈貞者不敢從死而事生烈者不逮事生而從

死事生孝也從死亦義也各成其志奚爲不可伯  
母可謂有嗣音矣嘉慶初愚溪館睢陽郵寄三節  
事畧屬余題辭余讀之一一皆昔時熟聞語爰括  
其巔末賦詩一章而爲之誌

君不見大松樹下竹與梅剛風百折節不回又不見白石  
根邊霜與雪清瑩一色競比潔洛陽任氏遭數奇姑婦三  
節世所稀劉母早嫠家金陵情甘茹荼更茹冰去井離鄉  
三千里午夜丸熊課二子誰知苦境萃一門幽蘭玉樹相  
繼焚血淚吞時聲已哽爲謀繼嗣絕復甦王氏矢志亦能  
賢毀容截髮伴姑眠高堂日日供旨甘婦代子職女如男



刺指易食真純孝倚姪慶兒承歡笑更有胡家女中豪香  
閨誓切守清操母氏溫言未肯從怒目叱嗔不改容旋復  
窺鏡對窗紗戲爲小妹起簪花歡言慰母母无傷從容歛  
步出中堂半疋羅纒三尺樹此是癡兒盡節處傷哉任氏  
三節苦兒亡並无孤可撫卓哉任氏三節賢其人其事信  
可傳劉母七十壽且康與婦日月並爭光貞者如石烈如  
金各成其志兩甘心坤元正氣塞宇宙堂前淑媛閨中秀  
鬚眉巾幗語不虛後先濟美更何如古來義節垂青汗採  
風補入列女傳

蔭宮杜生赴都入監作此送之

曹肅諭

學步邯鄲道燕都策馬行璧池春月曉槐市午風清序列  
金鐘位音傳石鼓聲潛心勤大業上苑最先鳴

散館留別諸生

曹肅論

作客憐親老言歸返敝廬書山斜月冷講坐片雲孤篋底  
詩千首燈前酒一盃草堂人靜夜瀟灑憶吾徒

農家四時樂

康誥  
邑人

田家之樂樂如何聽我爲君歌農歌三春不待新節去家  
家糞田仗驢駝農事未興思一笑春薺可采魚可釣大小  
歡呼東西舍擊鼓坎坎賽春社清明前後雨一犁種得棉  
花生柔荑桃杏花開雨初晴東家西家蠶事興鏡奩蠶出

黑蟻小數日卽白白更好舍前舍後百本桑婦女採桑上  
女牆晨興忽聞布穀聲荷鋤平踏麥隴青蠶食桑葉三眠  
起春去夏來四月裏農事將忙稼在目婦功先催蠶上簇  
遍地高插草一束草上纍纍可盈掬小麥青青大麥黃大  
家小家盡登場崇墉比櫛堆高秧滿平困廩實倉箱特地  
加力磨霜鎌今年麥勝似去年穗多粒飽三倍熟壓折人  
肩橫車軸農言喜得春雨足對婦誇張粒如玉婦方摘蒲  
色色新黃黃白白如金銀黃白壘壘不厭多爾壳蠕動飛  
黃蛾大婦懽忻喜不勝縑絲煮繭織吳綾織成吳綾不愁  
賣得錢正可償春債黑雲白雨聲簌簌地膏土潤種早穀

堆得角黍度端午端午前後不望雨五月恰旱六月陰大  
雨傾盆偏稱心三日五日率一雨雨來洗卻三伏暑耰鋤  
得時莠不生灘頭嘉穀早長成夫語婦兮婦敬聽捆載頗  
覺擔頭輕我方收穫爾提籃兒女快摘嶺上棉樂此不疲  
秋七月農家不知牛女節黃雲萬頃晚稼登家家場中打  
稻聲到處春烟炊菰米春去芒針稻不秕八月九月農更  
忙忙中自有樂深藏穫穀穫稻穫高粱刈黍刈稷刈豆秧  
白棉赤米堆滿廂黃柿紅棗挂滿墻豐收大有報秋賽麥  
畦隙地還種菜菜種蕪菁並白芥隆冬菜去麥無碍三時  
勤動閒在冬塞向墻戶避北風老農取草補茅屋農子負

芻牧黃犢米新麩陳釀酒香左右鄰家互相嘗小罌大罌  
合瓶鑑青松綠韭謹蓄藏歲時伏臘樂未央租稞輸完卽  
仙鄉菽水得意事父母葬祭竭力稱薄厚娶妻須娶農家  
女勤儉樸陋好作壻嫁女嫁爲農家婦布裙荆釵順舅姑  
生子聘婦不出鄉丈人峯插南北莊新婦三日入廚房先  
遣小姑嘗羹湯小姑頭挽雙髻了插鬢不過牽牛花長成  
嫁與東西家柴門相對不上車當戶夜織聲唧啞慣隨阿  
母供桑麻農家並非不曉事有兒學牧不學字人情何嘗  
參不透有女學績不學繡骨肉親友最認真不憑面孔只  
憑心冠婚燕會節與年省卻多少浪周旋相見並無許多

禮何須僕僕拜跪起主賓一笑當戶立短袖長拳作高揖  
不御梁肉不葛裘不乘車馬騎烏牛不慣脅肩不偃僕不  
解俯伏不叩頭不涉江海不登山不會離別會團圓誰知  
農家無憂慮誰知農家有深趣四時之樂樂有餘聽我農  
歌樂如何

春日雜興

劉潛邑人

鶴鳴忽驚耳仰視橫空來遽集淺瀨中斂翼無徘徊近在  
咫尺間相顧不相猜我昔苦寡歡此際契胸懷清高兼奇  
雅願得結同儕魯叟適山梁所以歎時哉

余本窮巷士亦愛富貴花燦燦耀疎籬春色暮景嘉有友

來相訪挈壺坐平沙醉倒錦繡間相顧樂無涯但覺天地  
濶不知夕陽斜起坐待明月毋惹風雨嗟

山中雨初晴登山采野蔬行未及山半白雲澹欲無巖花  
雜紅紫回首滿來途異禽鼓奇響天然調笙竽耳謀與目  
課獨坐得所娛一旬猶未盈倏然返蓬廬

才驚杏花落旋訝桃花凋皎皎梨花樹又復風雨飄歲月  
不相待少壯空勞騷古人邈難追詩書屢相招惟茲口耳  
學終恐愧芻蕘百年同寸晷著鞭在崇朝

布穀叫林柯破我晨旦夢披衣冒朝烟荷鋤事勤動石田  
東陵上麥苗垂露重踏露理荒穢淵明詩朗誦沾足情所

適身舍道自用敢學阮生狂妄發窮簷慟

門外千頭柳一株舞清風園中數畦韭萬葉翦還生蛺蝶  
戀夕陽白翻芳草英莓苔媚墻陰綠抱幽石貞翩翩兩黃  
鸝婉轉繞樹鳴此日誠何日欲問已忘情

晨起趨山田剔除初生茁晚歸臥蓬廬玩弄破窗月月色  
照我室我情爲飛越游心不拘境窮通何足咄脊令忽一  
鳴憂思來勃勃忝生誠所愧輾轉念明發

九日紀遊

劉潛

一徑出南嶺是爲九山麓越谿躡其背風勢正急蹙並力  
相攜持乃能稍定足西北望邾鄆繡壤錯且復少室形如



削卓立千古獨遙墟起孤烟飄忽任馳逐

至日紀遊

劉潛

帶醉仍縱遊斷嶺逢谿歇兩崖邃且深奇險過伊闕漸入  
氣溫暖寒泉凍弗結上有萬年柏保真戴華髮下有千歲  
鶴修翎銀光發定有仙人居方將窮搜謁忽聞霹靂聲巨  
石墜崒岬驚看日西沈歸途引明月

遊蒲池

劉潛

在山何澄清出山何澎湃歛然東石渠激盪遂東邁傍崖  
亂楊柳綠岸雜蒲稗急流入石罅聒聒如清話

憶昔文教興此間盛遊鳥蒲池固多蒲菱荷開紅白亭館

依修竹掩映標奇格於今悵衰歇泉石隔寒月

下山歌

劉潛

置身絕頂心豁悟俯視黃河向東注有風遠從嵩高來吹  
我襟裾霑花露別峯探得異香歸此舉定觸山靈怒不然  
何以行未及山半忽有懸石臨歧路岌業巍峩當我頭欲  
落不落如相怖乃知山靈固多私有求不已卽見惡驅使  
鴟鴞盤空翻惡聲啾啾不肯住須臾陰瘴四山合到此誰  
能任氣數拔劍橫斷妖氛開從容捧持下山去君不見荆  
楚貞臣招魂賦惟恐靈爽陷烟霧又不見杜陵野老桃竹  
杖每憂蛟龍肆覬覦

適老二首

段爲章

邑人

老來探蹟奧一卷太玄經消息靜中化生成動處靈惟堅  
心守白不惹眼翻青任運無留滯何煩勞我形  
道德求諸已沽名便失真恬然淡嗜慾爽矣裕精神靜肯  
探原委動機察本因希夷無所逆活潑盡天真

示兒輩經營太和谷山莊

段爲章

巖穴向陽好氤氳滿谷春渾忘時俗化最洽古風淳雞犬  
藏深曲桑蔭比鄰讀耕無事外相與樂天真  
遂生好景界無過是山家春色五株柳秋香三徑花研硃  
堪註易汲水可烹茶託足不求侈墻垣竹作笆

與徐鶴齋敘舊有感

段爲章

官閣投餐久萃原任嘯歌夜深燒燭短晝永品茶多形影  
休嫌瘦鬚眉且任皤非常道解悟相慰養天和

園中寓目

段爲章

日透烟花散園林景物饒櫻桃紅破嘴楊柳綠舒腰蟻穴  
乘陽啟蜂衙傍午朝化機生動處適趣任陶陶

柳下

段爲章

冉冉三春景悠悠百歲心從知朝與夕卽是古和今酒不  
辭微醉詩惟任漫吟婆娑柳樹下側耳聽鳴禽

遣興

段爲章

萬事雲翻影一生浪激花忘機愁不累適趣樂何嗟桑苧  
淵明里溪山靈運家隨時任曠蕩扶杖看烟霞

李元閣孝廉下第旋里

仗策長安十載遊歸來風雨暮山秋漢廷未許遺王霸唐  
室終當起馬周國餉西輸天地急洪河東決日星浮時河

南三省  
被災

明年人鏡芙蓉下看取當筵借箸籌

元日懷草窗元閣錄一

張子鶉邑人

默數清遊記往時嬰梁洛汭兩縈思談傾歐座劉原父文  
繼韓門李習之雪裏春回寒亦暖梅邊臘盡去還遲圍鑪  
呵凍自箋始首向綺窗憶所知

有感二首

張子鷄

攤書祛世慮，酌酒洗塵緣。  
作客非長策，歸耕有薄田。  
請纓平夙志，投筆悔頻年。  
時一吟梁甫，蹉跎愧昔賢。

太室羣峯護，芝田十畝閑。  
晚鐘鳴石窟，秋月湛緱山。  
遠岫行雲駐，平林倦鳥還。  
艱辛千里路，魂夢繞鄉關。

羽林莊雙柏之作

張子鷄

翠蓋高張拂曉烟，蕭齋相伴歎年年。  
紫紅隊裏誰相向，冰雪叢中獨見憐。  
月下無聲巢鶴夢，風前有影動琴絃。  
離亭一曲丹楓落，惆悵斜陽歲暮天。

望嵩

張子鷄

峻極瞻維嶽蒼茫接太空根原盤地軸勢自壓天中今古  
陰陽合乾坤指顧通會當凌絕頂日出看瞳矐

白娛

段為袞 邑人

清風掃竹扇明月伴書帷日醉花前酒知交莫說希

田家四樂

張凌雲 邑人

得得和風披面吹平疇如繡雨如絲布穀喚倉庚飛細麥  
輕花落日遲 長夏稻畦綠正肥薰風陣陣吹蓑衣人

影亂夕陽低荷鋤恰趁晚涼歸 豆花落水水無波羸

得西風上短蓑塲圃築倉箱多夕陽影裏太平歌 同

雲不動雪平鋪一年辛苦幸少蘇茅屋補酒滿壺家家婦

子盡懽呼

五日飲安溪宅

張凌雲

邛山之麓洛之涯斗大蕭齋處士家中有故人號安溪氣  
味淡於玉梅花梅花蕭疎最宜人君亦爛熳見天真冷眼  
從來不附熱每與狂士臭味親疎狂如子更莽鹵忘年續  
入金蘭譜屈指花晨數舊遊與君往還什之五五月五日  
正端陽舉世盡爲三閭狂纏菰角黍非吾事且酌蒲樽共  
徜徉徜徉竟日未肯罷我卜其晝君卜夜相偕相伴入斗  
室清風明月知無價座中于陽更清芬議論樸拙不尙文  
對坐談劇渾無礙披肝露膽持贈君君家伉儷頗賢淑有



香果元名二二二  
子連珠稱式穀林兒雍雍捧盤養竹兒嬌小自端肅如此  
清貧靜中過與世無求樂事多君爲我言不得意我爲君  
唱扶風歌卽今世人鬧端午風流何處非荆楚湘妃爭唱  
迎神曲山鬼齊伐招魂鼓此時疇能稱獨醒堪弔汨羅屈  
子靈爭似吾曹共杯酌兀然一醉夜未暝醉後白眼看清  
天天上今夕是何年欲著謝公雲霞屐摘取星晨當酒錢  
忽然一陣狂風起吹送更漏夜入子冉冉流光共水逝須  
與千古都如此噫嘻日月爲誰留轉眼長夏又清秋功名  
富貴會有時莫爲無成歎白頭

夢遊慈雲寺

張凌雲

秋天空秋氣衝秋風颼颼秋雲重秋水盈盈含翠翡秋山

面面削芙蓉我乃宋玉驚秋客秋來每嫌眼界窄一夜飛

夢入林泉琪花瑤草仙人宅浮戲山色列翠屏亂峯削劣

鬱青青頃刻雲山落吾手飄然直上謁山靈山靈引入招提

境石弄泉聲水氣冷降魔天嬌噴嵐光寺前有降魔峯青龍蜿蜒

飛雲影寺之右有青龍溝甚幽邃欲叩天門步銀樓寺南有天門峯松風長吼

海天秋無邊濤聲捲木葉吹墮梧影碧雲流引領還登寺

之麓峯名二老摩頂禿寺之後有二老談經峯二老何年跨鶴去剩

有白雲鎖松屋到來意興迥不凡捷足一躍踞曉巘懸崖

壁立千百仞不攀荆棘攀松杉忽然法鼓鳴清晝慈雲寺

僧金罡奏簷前紛飛天雨花仙雲靄靄出層岫岫雲亂起  
烟淒迷長空杳杳鳴天雞上捫星辰苦有路下臨洞壑疑  
無蹊須臾報道佛光現蒼茫雲海蒸奇變爛似慶雲暈若  
霞林巖五色增蔥蒨靈妙道真難名鐵笛一聲暮烟橫疑  
是子建遮須國直到法華險道城

法華經云法華道師多諸方便於險道中化作

城一揖讓側坐仙人裏左右黃石赤松子真人餐我金液丹

玉女贈我珊瑚樹振衣長嘯躡雲端滄海如掬山如拳白  
鶴健飛勢凌厲神龍欲下復盤旋憑虛一身輕如紙東遊  
石城西羅水指點奇峯五十三欲探風月幾千里風爲馬  
兮霓爲裳雲爲車兮驂翱翔忽魂悸兮以魄動覺來蕭索

夜正長人生大夢亦如此利鎖名韉胡爲爾從此窺見造  
化奇盡捲乾坤入詩筆

觀飛泉圖

張凌雲

盡幅崛起千仞峯巉巖峭削插清空非虛非浮非峩眉疑  
嶠疑壺疑瀛蓬似此奇觀真罕覩不在名山三十六部之  
籙中我欲因之訪畫師是誰老筆寫崑龍跌宕揮灑得盡  
理烟林霧樹皆可喜飛泉卻出沓嶂間山卽真山水真水  
山水明秀萬壑開烟雲飄渺現樓臺懸崖瀑布盱愕眙晴  
天如聞風雨來溪邊二老顏色異偶坐似是莊與惠逍遙  
共得濠上樂悠然誰識臨淵意高人棲遲碧山堂渾是一

片水雲鄉維我素有烟霞癖對此不覺神飛揚安得畫師  
畫元圃出入真人並王母中有五城十二樓瑤林珠樹挂  
蓬戶卧遊常與神仙接尻輪神馬生鼓舞噫噓嘻幻哉快  
哉亦壯哉但覺仙風珊珊爲我洗塵埃

戲題宋西亭青雲梯說

張凌雲

競說青雲路豔稱青雲梯折得蟾宮桂名在雁塔題西亭  
宋子不謂然別有雲梯堪攀躋我聞學有上達道有岸聖  
人堂奧與天齊美大神聖真高妙此中層階自可稽導我  
前者濂洛關閩諸夫子鼓我氣者江都長沙韓昌黎龍門  
扶風相推輓子雲相如共攜提一級一級勢愈難行行不

敢半塗棲直上太虛八十四萬里俯瞰三十六部名山低  
矯首揚聲叫閶闔閶闔砰然開兩扉鞠躬再拜謁上帝上  
帝曰都我有綸綍汝掌之酌汝九霞觴中酒餐汝九陽鼎  
內珍珠麋上與日月爭光輝下與塵世掃糠粃千秋事業  
惟汝爲汝往欽哉勿躊躇噫噓嘻快乎高矣並美矣瓊樓  
玉宇切仰止巖嶠兀立天地間青雲之梯端在此君不見  
高才捷足登龍虎攀龍附鳳忻鼓舞雲梯幻作韉與鎖浮  
名終歸塵與土

齋中陶室

張凌雲

鑿土聊成窟塗泥便是墻惟茲容膝地合作讀書堂放眼

乾坤大舒懷日月長柴門常自掩高卧擬羲皇

跋曹遵三游草後

張凌雲

衝風冒雪下黃岡

敘云於臘一日起程

滿拾珠璣入錦囊山水別

開真面目

草中有過梅山暨江行諸詠

鴈魚點化大文章

又有食魚雁所詠

思

親夢繞家千里

草中有臘入日慈壽感懷一章

別友腰懸劍一張

別友有行李一

肩劍一

潦倒愁吟誰得似感懷欲辦少陵香

自敘云余與少陵居同里

難同遭所依又有同情非敢謂瓣香公詩聊以誌潦倒愁吟曠百世而相感云

過賀元鼎山莊

李夢蛟

邑人

地古山川秀人稱第一流琴書清有韻詩酒淡無憂谷深

伏牛路河明挂鼓樓不知桑柘裏高卧幾經秋

松筠任生合卷詩以示之

李夢蛟

萬化先男女婚姻乃大倫而今看醮子此後是成人勿使  
心時放以求學日新東萊傳博議稽古好爲鄰

嵩廬兄廬墓

李夢蛟

親懷三年免廬墓亦三年寧云足相酌子心終缺然吾兄  
全孺慕依依二人前无何椿萱落谷口卜牛眠朝哭九山  
雲暮哭九山烟雲烟哭不已歲月悵遞遷人生有大節百  
行孝獨先似此報春暉真堪啼杜鵑不見荒荆上悲風生  
暮天

無題

劉凌漢

邑人



躁人詞常多閨門亦齟齬每當反目時相對無一語予自  
繙書籍爾自整線縷相敬不如梁同客有愧呂須當問刑  
于漫云非吾侶試與詠詩歌谷風致陰雨責人應兩失徒  
自託清醕

題漢留侯訪赤松子圖

李桂齡

邑人

將相襟期婦女容如侯乃是人中龍一生作用根黃石晚  
節功名靠赤松劍氣猶餘滄海壯馬蹄已帶野花濃回頭  
笑問來時路嶺外浮雲有幾重

恭和平泉先生新春截句

劉瑞律

邑人

淑氣遲遲戶半扃塵氛不到子雲亭閒中細檢春多少纔

有長楊眼杼青

晴空蕩漾裊游絲正是寒光乍退時最愛和風來座上催  
人早賦冶春詞

感懷亡室

馮安常

邑人

當卿屬纊日是我正中年高堂有老親兒女劇可憐遺此  
千金擔挑向何人肩俯仰難爲地思欲續斷絃豈知家落  
寞到處惹人嫌慨然許婚嫁轉瞬忽變遷曾藏五車書何  
如半頃田文扛百斛鼎何如執牛鞭清操厲冰雪何如逐  
腥膻生平負虛名畫餅不值錢感此傷我心萬箭一齊穿  
呼卿卿不應淚下如流泉有卿寧覺好今始知卿賢百凡

不如意空空憶從前

無題

馮安常

舟子沈沈睡夢中醒來可到夕陽紅  
連忙解纜休留戀趁得前頭是順風

詠青龍峰石人

閻梅人

閒中高士靜中禪世外奇人塵外仙  
一頂圓光摩日月千秋瘦骨挂雲烟  
應偕岳丈同觀海曾爲媯皇密補天  
認得老兄惟米芾蕭然袍笏拜當年

和王菱江遊嵩陽原韻 錄一

王裕甲人

篆文蟠曲折雙闕共苔荒字斷神猶勁  
雲崩石不僵古今

歷時代造化故留藏碧落碑雖妙觀來未足當 啟母石闕

凶年書事十二首 錄二

王裕甲

村里蕭然四壁空他鄉覓食各西東  
釜鬻擔荷塵容黑妻子牽連淚眼紅  
儘日哀鳴同旅雁長途轉徙類飛蓬  
流離縱使圖堪獻難繪嚴霜與烈風

婉變堪憐季女饑異方販去貨居奇  
囊空易斷夫妻愛食盡難全父母慈  
頻望前途期後會轉歎死別勝生離  
無愁惟有庭前月漸漸團圓似舊時

贈張又碩穎

王裕甲

高士幽居水石邊  
邛雲洛樹繞門前  
家風久著三蘇勝  
科

香林齋老二十六 子復四  
第應同二宋傳兵燹震驚川欲沸琴書剝喪磬空懸災由  
先安心何病境遇窮通且任天

過鞏縣東站書座師華陽相國卓公謁杜工部祠題

壁詩後并引

徐光第

相國原詩云憑弔詩人過舊墟荒蕪迥異浣花居  
何時持節能來豫眼底荆榛爲翦除公本蜀人故  
借浣花草堂託諷末書道光四年八月七日海帆  
題壁屈指已三十四載矣憶公決獄衡文奉命出  
使者不一次而獨未來豫以償舊願十年宰相久  
已騎箕余以公門老弟子棖觸舊章撫今追昔爲

書四絕於後以抒感慨

萬間廣廈士無寒猶記休休相度寬  
柱老有知應一快吾廬獨破也心安

卅載光陰疾若奔蛛絲蝸篆澆題痕  
便教持節曾來此古壁紗籠詎猶存

浣花溪上舊吟牋曾與詩王訂後緣  
此卽西州門外路令人一讀一潸然

剪除榛莽竟何時夙願空留壁上詩  
陸氏荒莊同一慨不須重問少陵祠

醉歌行贈陳品齋

榮增

卽以留別

崔嵩喬

邑人

雪花飄飄大如手陳君餞我飲旨酒一時相邀盡酒人我  
今不醉復何有君是當代劉季倫與酒幻成未了因幾回  
欲戒戒不得興酣踏破甕頭春自言少年赴帝京潦倒燕  
山滯行旌故鄉望斷千里外海濶天長路難行旅館孤燈  
雨瀟瀟終日懊惱無昏曉平生謬說出門易到此方知在  
家好消愁無別方遣興自有道提榼喚村童爲我酤清醪  
五斗不爲多三升不爲少經宿盡此壺中物庶將困頓抑  
鬱一齊掃邇時只期慰牢騷不料五十年來竟與紅封綠  
友絕不了昨日設綺筵正值雨雪天我今捲帳歸彈指已  
三年人生離合亦常然相對何必情悄悄與君同是醉鄉

人且復痛飲共追權銀燭高張列旗鼓睜眼豎鬚將力努  
十指疊戰爭勝負文人也似武夫武鬪厥一聲哮如虎滿  
座賓客惜無語座中觀賓環如堵震煞焦三

寶書

與陳五

玉堂

天公也爲張聲勢六出雪花肆飛舞盛哉此宴足千  
年區區年華何足數大家忘形到爾汝誰是賓朋誰是主  
狂來語言多支離那管旁人笑儒腐我今直拚此一醉庶  
幾倒臥西窗忘此三年一旦別離苦

騎驢吟贈范彝齋

崔嵩喬

君不見杜陵老去尙無家卅載騎驢客京華又不見太白  
騎驢華陰行縣宰無端問姓名羨君日行無百里長遊卻



愛南山裏忽聞夜雪鞏梅春一路探花覓不已不踏九衢  
塵山村亦覺好不肯過縣門省被宰官惱鳥語花香助吟  
情水容山色增詩稿雲峯乍湧一輪高明月催歸別路遙  
廣有新詩吟未穩帶將驢背作推敲

送趙修來北上

崔嵩喬

蟾宮丹桂和雲栽衢路先登早折回

十七膺  
鄉荐

人是無雙稱

國士我聽第一響春雷得珠端要探驪手奪錦爭看倚馬  
才自古文章原有價班生此去亦仙哉

丙午秋闈報罷諸同人具酒相慰賦詩呈覽

崔嵩喬

結髮從戎二十年

報日王霖三以出師今見寄故云

凱歌待唱晚涼天

封侯已去官多貴射虎空談數有權  
短笛聲淒吹夜月焦桐絃冷爨秋烟  
此生未必全無用爭奈霜絲繞鬢邊

西風瑟瑟透衣寒舉酒當筵慘不歡  
含淚偶逢知己落無才終覺報君難  
飛鴻響遠秋書恨老桂花飄古木殘  
慚愧諸公來過我年年雲路望鵬搏

倏忽雲泥竟不同蒼蒼何處問窮通  
村醪拚醉重陽節霜杵敲殘午夜風  
按劍祇因投闇昧捉刀或可辨英雄  
上書休怪人頻逐爲說秦王術未工

也知身外是浮名石火光中寄此生  
未免炎涼多世態難

忘得失亦人情幾回謬算思投筆一第無能况請纓薄有  
園田歸去好杏花烟裏課春耕

癸卯遊五雲山

張啟元

聞說名山此最幽幾回夢想今來遊振衣直上岡千仞屈  
指恰逢歲九秋石上任憑高士卧空中只許白雲浮謝公  
屐齒徧天下不識也會到此不

涵萬太翁小引

丁元熏 邑人

偉矣張夫子書林第一枝持躬真碩士濟世亦名醫相見  
便呼酒乘閒愛作詩宵深猶燃燭正讀隨園時

病目引

王嵩生 邑人

業從吉凶生功則鬼神佐向使非病目如何肯靜坐靜坐  
百日餘省出自已過讀書但上口枉自推空磨辜負古聖  
賢廉頑與立懦平生負意氣不受一毫挫庸知今若此理  
合千刀剝甘心千刀剝何事撇不過苦海一回首勢如竹  
之破於獨密以慎於行嚴以課無忘坎之險還凜離之錯  
汲汲毋欲速循循毋敢惰心在腔子裏身同天台卧回首  
憶從前直是舟無舵耳目任其引手足無所措不管是與  
非焉知福與禍看來者一病可欣更可賀

春遊

孫函三  
邑人

山容如笑翠如眉正是尋芳鬪草時幾處踏歌人擾擾芒

鞋竹杖上青獅

一樹桃花映澗紅  
濃香撲過小橋東  
誰家院落春如許  
戲蝶紛紛鬧午風

喜雨吟集唐

孫函三

夜雨滴空階  
千珠簷下墜  
池塘草漸生  
茸茸添新翠  
桃花帶雨濃  
嬌豔千般媚  
攜酒去看花  
酒酣花亦醉  
南湖夜來雨  
點點墜  
波心曉起看  
新漲潮痕幾  
許深夜來  
風雨聲  
片片花爭落  
花落子初生  
漫言風雨惡

久雨吟集唐

孫函三

既雨晴亦佳  
如何天地閉  
連宵枕上聞  
簷溜聲聲細  
夜雨

滴空階驚心還恍目時聞瀑布聲恐壞魚鱗屋雨從天上  
落銀漢勢如傾不耐鳴泉聒青蛙竈裏生密雨如散絲重  
重遮宇宙願爲鍊石人暫補青天漏

喜雪吟集唐

孫函三

雲垂雪意凝雲起日沈閣莫道北風涼梅花當戶落只言  
花似雪雪更白於花花雪休相妬同歸處士家絳雪下仙  
家柴門無客過那知雪有情留伴袁安卧風雪夜歸人滿  
身沾玉屑無瑕品自超炙手何須熱

遊家師竹觀察小園看牡丹

孫道恕

邑人

小園半畝頗幽清薄暮偷閒輒一行最是流鶯能解意迎

門先叫兩三聲

館壁懸畫魚一幅戲題

宋之奎

邑人

天生食客寄他鄉東道多情勝孟嘗莫唱歸來彈鋏曲案頭盈尺挂河魴

夏日過竹軒先生山齋

宋之奎

欲從何處覓仙鄉但到幽居便納涼四壁雲山修士宅庭花草讀書堂交非在酒偏多飲友可論文拙不藏話久那知歸路晚蟬聲無數噪斜陽

石窟寺題壁

張栗

鑿洞者誰氏工力疑鬼神如來無我相忽得許多身鋪張

千載上奇譎到於今徒存舊日蹟不見舊日春宿雲蝙蝠飛  
破積土蛇印新頂裂月補面胸開雨洗心苔紋續脫袖草  
色緣敗巾丐夫熏朝暮白晝亦陰森佛法雖云樂我顰佛  
亦顰每在招提游未忍作啞喑寄此鄙言辭留質箇中人

懷馮樸園夫子

董以威

邑人

棒喝當頭幾度經春醴滿酌醉初醒年來未步蓮花月辜  
負窗前草色青

鞏城春日卽事

孫友信

邑人

春草連城綠人家傍水涯夕陽殘照外間看泛魚槎

感時

孫友信



世路本嶮巖機械今復多南山設陷阱北山張網羅徧地  
長荆棘當路橫矛戈狡兔無處走飛鳥不敢過一被鷹犬  
獲後悔空蹉跎我欲學解網恨手無斧柯復欲前致詞多  
口畏譴訶閉戶長歎息此事竟如何

題畫

董乃瀛

邑人

拍岸驚濤水一湖青山隱處是姑蘇漁翁蕩槳中流去曾  
遇當年范蠡無

題湖心放舟圖

董乃瀛

半天雲霧捲秋羅四面峯嵐映綠波最好湖心船放處隔  
隄樓上起笙歌

過鞏縣作

陸 昕

今來又買野村醪不見東周氣象豪  
一片河聲趨洛汭四圍山色壓成臯  
巖陵灘急星辰動杜子祠荒草木高  
獨有平津橋畔柳年年春水繫漁舸

過鞏縣工部祠堂

吳重熹

六十年來奉公集今朝故里拜叢祠  
傷心烽火連三月何日重吟劍外詩

蟠桃會歌壽劉母孫太夫人七十

許鼎臣

蟠桃根蟠河源黃蟠桃花發天地香  
蟠桃實結三千霜未許歲星先偷嘗  
蟠桃會上祝陵岡劉母母儀侔姒姜  
得位

晉書卷之三十一 卷之三十一  
祿名壽而昌長男巨刃摩天揚裊然國家柱石梁四五翊  
以百夫防餘亦礪礪不可當鳴鳩均平心則常女亦能織  
雲錦裳爚爚跂彼銀漢傍諸孫首領汾陽王子聳孫倩笏  
滿牀嘉賓鼓瑟吹笙簧陸自津海滬杭競騎麒麟翼鳳  
凰南極投几北極觴南斗挹酒北斗漿王母一笑無期疆  
雙成飛瓊相扶將留核且植嵩與邨散作丸球長生方天  
雞高高叫九閭蟠桃倒影接樽桑初日一輪黃金光

題劉節母祠

張仲友  
邑人

丈夫青年竟作古遺腹未卜生男女眇眇深閨一弱息門  
庭寥落悵無主況復堂上雙白髮喪明之痛腸已腐際此

天厄難生存同赴九原非所苦節母別自爲懷抱一死誰  
復延父祖忍死須臾撫藐孤自昔天漏媧石補舅姑繼逝  
歸邱隴諭兒從師渥修脯霜晨雪夜勤操作不知人間有  
痛楚外營田園內室家隻身作母兼作父三十二年茹荼  
蓼屈指初孀歲廿五懍然大節世所稀應與陶歐作儔侶

漫興

王敬芳

邑人

年來情趣寄鳶魚嬾向案頭翻故書指與兒童仔細看月  
明明處是清虛

春來大地暖風吹草木生生不自知若向枝枝葉葉數百  
年那是數完時

勸學詞

王敬芳

邑人

數聲蕭鼓二更天寄語榜人莫漫眠月正圓兮風正穩明  
明光地好行船

